

TAAME JISOS

Jisos bungu re, "Taame tv me"
Jon 14 : 1



ECCLESTON ST., LONDON SW1W 9LZ
Printed in Great Britain

Yehke ebtim ena kpee wo
kunu Ntul Esowo wahre. Ka
tonngo go ga ebkahne. Ka
kere re ebkahne ena bahk-a
ebo kak. Ejum ajehng ajehng
ji a kp'limi jo tonngo Ntul
Esowo. Ye wo bahk-a tibi
etingitingi mbang nyi nno.
Ngaane 3 : 5-6

Taame tv Ntul a Jisos, a
bahke bele eltahre.
Eltum 16 : 31

Bel ekunukpu goji Ntul
Esowo go ngare anyehng
anyehng. Saam 62 : 8


Nwer nyia, bo ko alum Esowo nya lohng yefono
nwer Esowo kak. Fuumu re wo bel nwer
Esowo, jo lung, tibre alum nya wob atahng,
Esowo bi lennge no ka ane kpekpe.

Jisos limi mbahne a nob

Ane kehm koko mbahne ba a ne, nyi bo sol-e go edilnong. Bo jo gare re bo yel a ne go ekp'kpa, song bum-e go alata nya Jisos.

Bo tingem mbang anyehng anyehng nyi bo bahke sehng a ne tib ellong ane bao. Owo bo kehm wahre a ne go ero etahk, kehm song lahm elbulu, kehm tahre alehke nya bo kanne go edilnong jio tete ba rehng go elka ane bao, edi ji Jisos jolo no.

Eji Jisos nyehne ana bo ma taame



tv-e, owo á kehm bungu re, “Mbi, abiafem enya, me n tahm ka-a.”

At'tibi ba atahm, a Bab Farisi kehm kehme elbungu atemtem re, “Anv, ye elkohn nne awo, no kp' bungu ab'bi alum ana nyaa tob Esowo? Nne awo bahke ma tahm ka nne go ege abiafem? Esowo ntahngtahng bi bahke ma tahm ka nne go ege abiafem!”

Eji Jisos ma seb kahn ana bo jo tir, owo á kehm faange bo re, “Elkohn ntir anyi n kp' tiri go egahna ntim? Jen ji ga riidi, n l' tong nne noa re, Abiafem enya me n tahm ka-a, afi n l' tong-e re, Mehl yiimi, wo jen? M bahk-n tibi re, Mmon no nne kpi nsahm go njini nyia, nyi á bahke ma tahm ka nne go ege abiafem.” Owo á kehm tongo mbahne nyio re, “N kp-a tongo re, wo tahm, rod edilnong eja, song kehnge!”

Tv tv o nne noo kehm soro mehl yiimi go esamahr ane bao, rod edilnong ji á noongo no, tahm eje kehngé, jo tehk Esowo asongo. Ane bao kpee kpo bo esi area. Bo kehm kehme Esowo tehk afahlafahle, fere jo bung re, "Wahr ebnyehn akpokosi nsol lela."

Luk 5 : 18-26

Jisos limi awakamahr ane abal bo nyehn

Awakamahr ane abal kehm kehme Jisos eltoono, fere jo rabe re, "Mmon no Devid, nong, wahr lub fil-a ndon!"



Eji Jisos yele go ekp'kpa, awakamahr ane bao kehm ba kpir-e. Owo Jisos kehm bahbe bo re, "Anv, n kp' taame re m bahke ma lim ejum ana jiaa?" Owo bo kehm taame re, "Ee nsoo."

Jisos kehm kooro bo go amahr, kehm bungu re, "Nong, jol ana m ma taame." Amahr ebo kehm soro lennge. Matiu 9 : 27-30

Eblum ni jolo bade nnenkal no taame tv Jisos

Nnenkal awohng jolo o, no alung jo lohng-e go nnaab go ewubu a nya ebal. A ranng akpohko nya a bele no kpee, ka abalimakahm. Jol nne nne we tikem ma lim, a nob. Owo a kehm jeere kohlo Jisos go njahm, fere koor-e go ege es'sili nsubu. Tvtv o, alung eme kehm soro kimi.



Jisos kehm bahbe re,
“Nne awo ma-m kooro
a?” Eji ane kpee ma ten,
Pita kehm bungu re,
“Nsoo, ellong ane ni kp’
jene a na, ni ni kp-a
sehme.” Owo Jisos
kehm kpe bung re, “Nne
ma-m kooro. Tibre me n
kahn re, nsahm ma-m tele
lohng.”

Eji nnenkal noo sebe
kahn re, á nehm ma biiri, á kehm
lohngo kp’ kahme abake, ba gbo
jamm-e alahng, kehm tooro go esamahr
ane kpee, ana ji wahnge á koor-e no,
fere tong ana á soro nob ngare ny’nehm
o.


Owo Jisos kehm bungu re, “Mmon
ewame, eltaame ena ni ma-a lim, a ma
nob. Song go eyebatahng!”

Luk 8 : 43-48

Jisos bungu tong nfeb a ebuku naange

Jisos kehm tongo abat'toono ebe re, "Wahr siiren eto jia, rehng go egbuk jehko." Bo kehm yake ellong ane bao. Abat'toono ebe kehm tahme yel egbang. Ngare nyio Jisos ebyel. Agbang nyako tob jolo o fvfo.


Nfeb nyi kp' tahne kehm bake. Ebuku kehm kehme ellimi. Alahb kehm jo kim, yel egbang, ba elruru.



Jisos noongo go nnaahb egbang jo lal.

Á kunu esi go etisi. Abat'toono ebe kehm-e nyahme re, "Nt'tibi, wa nehme luba, wahr ga yahke tano?!"

Jisos kehm mehle yiimi, kehm bungu t'tahne, tong nfeb re, "Rahke!" Á kehm fere tong ebuku re, "Goomo!" Nfeb nyio kehm rahke. Edi kehm naange soom.



Jisos kehm fere bung tong abat'toono ebe re, "Jen ji n' kp' fahle ana? Jen ji wahng ka n' kil-m elbumu go etingitingi?" Tibre bo fahle sehng.

Bo kehm kehme elbungu atemtem re, "Anv, elkohn nne awo anae, no kpo bung tong nfeb, a ebuku, wuk-e?"

Mark 4 : 35-41

Ntul, wahr kp'kahne re, nne awohng awohng no l' bum ntir enye go ega, a bahk-e kake eyebatahng go ege ebtim, tibre ye kp' taame tv-a.

Fvfo, nobo re wo rodo ekunukpu eja bum goji Ntul Esowo go ngare anyehng anyehng, tibre ye li Esowo bi li ana ekpartal ji li go njinanjini, ye wo bahke jo tahr-r ngare anyehng anyehng.

Aisaya 26 : 3-4

Jisos jene go ero alahb

Jisos kehm tongo abat'toono ebe re bo yel egbang, gbo-e mband, song go egbuk jehko, ye samme ji, yaame ane bao. Eji á ma yaame ane bao, owo á kehm tahme go ewong antahng re á song kak ero. Eji elgung ba no, Jisos kpe jol ntahngtahng go.

Ngare nyio egbang ebrehng go nlum alahb. Ebuku jo gbulu egbang bio tv edi ajehng ajehng. Tibre nfeb jo lohngo go bo a mbuksong. Nkpese efungfu wo, Jisos jene ero alahb, song kpiri bo.

Eji abat'toono ebe nyehn-e no á kp'jene go ero alahb, kehm mennge bo. Bo kehm bungu re, "Etohko ji," fere rabe elfahle elfahle. Jisos kehm soro bung a bo tvtv re, "Boben eltim, me wo, kana kpe fahl!"

Owo Pita kehm-e faange re, "Nsoo, l'

lohko jol re wo wo, tong-m, me n lohng, jen go alahb, ba kpir-a!” Jisos kehm-e tongo re, “Ba!” Pita kehm lohngo go egbang, kehm kehme eljene go ero alahb asongo goji Jisos.

Eji á nyehne re, nfeb nyio kp’ limi area, á kehm kehme elfahle, soro kehme eltere, kehm rabe re, “Nsoo, tahr-m!”

Owo Jisos kehm soro tanne ebo ebe, jabb-e, kehm-e tongo re, “Wo ji kp’ kahn taame ntiil, jen ji wahnge a kehm f’faabe me?”


Eji bo feere song yel go egbang, nfeb nyio kehm soro naange. Ane ba woomo go egbang kehm ba jamm-e alahng, kehm bungu re, “Etingitingi, wo Mmon Esowo wo.”

Matiu 14 : 22-33

Eji Tomos nyehn re Jisos eblohko nyahme go elkv, á kehm tob taame tv-e

Efung b'nehm ona bi jolongbokambang
efung go erahde, elgung nio ona,
abat'toono Jisos woomo ekp'kpa
ajehng, gbaange abutahk kpee tv elbo,
tibre bo jo fahle Jus. Jisos kehm bake,
ba yiimi go bo ellong, kehm kake bo
nnyo re, "Belen elkoono!"






Á bungu kan ano mal me, á kehm tibi bo abo enye, a ngbaange. Abat'toono ebe bele eyebatahng sehng, eji bo nyehne Ntul abo.

Tomos ji woomo go ellong abat'toono Jisos, ewubu ane abal, ji bo jo lung-e re Ayafele, á jolem a bo ona ngare nyi Jisos ba no. Owo abat'toono Jisos bako kehm-e tongo re, "Wahr ebnyehn Ntul."

Á kehm faange bo re, "Tohko tiki jol re, n nyehne anv nya abang aba go ege



abo, nya bo kum-e no, fere kooro ebnyohkobo go anv nyao, fere lak ebo ebame go ege a ngbaange, n nehm tiki taame.”

Eji ma kang nfung enehkeni, abat'toono Jisos kpe je edi jio. Tomos jolo a bo o fvfo. Bo ta abutahk kpee. Jisos kehm kpe ba lohng go bo ellong, kpe kak bo nnyo re, “Belen elkoono!”

Á kehm tongo Tomos re, “Koor-m ebnyohkobo a, wo fere nyehn abo enyame. Tanne ebo eba, wo lak-m go

ngbaange. Ka kpe faabe, taame na taame!”

Tomos kehm-e faange re, “Wo wo li Ntul ewame, a Esowo ebame!” Jisos kehm-e bahbe re, “Wobtaame tib eji a ma-m nyehna? Elfuulu li ka ane ba ki nyehn go amahr, bo taame na taame.”

Jisos limi akpokosi gbalee go esamahr abat'toono ebe, nya ki wob nwer nyia. Nyaa bo nyono, goji n' l' taame re, Jisos wo li Kraist ji Mmon no Esowo. N' l' taame, m' bahke bele elkpin go ege a mbing. Jon 20 : 19-20, 24-31

© World Home Bible League